



XUNTA ELECTORAL DE GALICIA

Asunto: Procedemento Sancionador 4-2024

Acordo da Xunta Electoral de Galicia, do 12 de febreiro de 2024, polo que se incoa un procedemento sancionador en relación coa denuncia dos representantes xerais do Bloque Nacionalista Galego (BNG) e do Partido dos Socialistas de Galicia – PSOE (PSdG-PSOE) contra o presidente da Xunta de Galicia, D. Alfonso Rueda Valenzuela, polos feitos relacionados coas súas manifestacións nunha rolda de prensa o 8 de febreiro de 2024.

A Xunta Electoral de Galicia, á vista dos seguintes

ANTECEDENTES

- 1.- O 9 de febreiro de 2024, as representacións xerais do Bloque Nacionalista Galego (BNG) e do Partido dos Socialistas de Galicia – PSOE (PSdG – PSOE) formulan sendas denuncias contra o presidente da Xunta de Galicia e candidato do Partido Popular, D. Alfonso Rueda Valenzuela polas declaracións emitidas tras a reunión do consello da Xunta de Galicia do día 8 de febreiro de 2024 (doc. RE 462/2024 e RE 468/2024, respectivamente).
- 2.- O día 9 de febreiro de 2024, logo da reunión da Xunta Electoral de Galicia, trasladóuselle ao Partido Popular (RS 1201/2024) e á Dirección Xeral de Relacións Institucionais e Parlamentarias (RS 1202/2024) copia da denuncia do BNG, aos efectos de formular alegacións. Deste traslado deuse coñecemento á representante xeral do BNG (RS 1203/2024).
- 3.- Tamén o día 9 de febreiro de 2024, logo da reunión da Xunta Electoral de Galicia, trasladóuselle ao Partido Popular (RS 1206/2024) e á Dirección Xeral de Relacións Institucionais e Parlamentarias (RS 1207/2024) copia da denuncia do PSdG-PSOE, aos efectos de formular alegacións. Deste traslado deuse coñecemento ao representante xeral do PSdG-PSOE (RS 1208/2024).



XUNTA ELECTORAL DE GALICIA

4.- Cumprindo o trámite concedido, o 10 de febreiro de 2024, a Dirección Xeral de Relacións Institucionais e Parlamentarias, a través da Asesoría Xurídica Xeral da Xunta de Galicia (RE 478/2024) e o Partido Popular (RE 481/2024), formularon alegacións á denuncia formulada polo BNG.

5.- Do mesmo xeito, e cumprindo asemade o trámite concedido dentro do prazo outorgado, o 10 de febreiro de 2024, a Dirección Xeral de Relacións Institucionais e Parlamentarias a través da Asesoría Xurídica Xeral da Xunta de Galicia (RE 479/2024) e o Partido Popular (RE 482/2024), formularon alegacións á denuncia formulada polo PSdG-PSOE.

6.- O 12 de febreiro de 2024, a Xunta Electoral de Galicia acordou a acumulación das denuncias descritas, estimando ámbalas dúas e declarando que o presidente da Xunta de Galicia, D. Alfonso Rueda Valenzuela, incorreu na prohibición establecida no apartado 2 do artigo 50 da Lei Orgánica 5/1985, do 19 de xuño, do Réxime Electoral Xeral (LOREX), por non ter respectado o principio de neutralidade política polos anuncios enumerados e declaracións efectuadas na rolda de prensa posterior á reunión do consello da Xunta de Galicia do día 8 de febreiro de 2024, ordenando a retirada da páxina web da Xunta de Galicia das manifestacións denunciadas e determinando a incoación do correspondente procedemento sancionador contra el, pola presunta infracción do parágrafo segundo do artigo 50 da LOREX.

FUNDAMENTOS XURÍDICOS

O art. 18 h) da Lei 8/1985, do 13 de agosto, de eleccións ao Parlamento de Galicia, atribúelle á Xunta Electoral de Galicia a competencia para corrixir as infraccións que se produzan no proceso electoral e, consecuentemente, para resolver este procedemento sancionador.

O artigo 153.1 da LOREX, regula as infraccións electorais das normas obrigatorias establecidas nela que non sexan constitutivas de delito e establece como sanción, unha multa de 300 a 3.000 euros se se trata de autoridades ou funcionarios.

Visto o art. 50, segundo parágrafo, da LOREX, interpretado polas instrucións 3/2019, do 4 de marzo, e 2/2011, do 24 de marzo da *Xunta Electoral Central*.



XUNTA ELECTORAL DE GALICIA

Visto o artigo 120 da LOREX, que se remite á lei reguladora do procedemento administrativo común en todo o non expresamente regulado en materia electoral pola primeira.

Visto o disposto na Lei 39/2015, do 1 de outubro, de Procedemento Administrativo Común das Administracións Públicas (LPAC), de aplicación supletoria.

A Xunta Electoral de Galicia adopta o seguinte

ACORDO

Primeiro. Incoar procedemento sancionador en relación co presidente da Xunta de Galicia, don Alfonso Rueda Valenzuela, derivado da denuncia acumulada das formacións políticas Bloque Nacionalista Galego e Partido dos Socialistas de Galicia - PSOE, polos feitos derivados das declaracións efectuadas o 8 de febreiro tras a reunión do consello da Xunta de Galicia, por unha posible infracción do art. 50, segundo parágrafo, da LOREX.

Segundo. Nomear instrutor a don Antonio Martínez Quintanar, vogal da Xunta Electoral de Galicia, e secretario a don Xosé Antón Sarmiento Méndez, secretario da Xunta Electoral de Galicia. Ambos manifestan a aceptación do nomeamento e declaran non estar incurso en causa de abstención das previstas no artigo 23 da Lei 40/2015, do 1 de outubro, de Réxime Xurídico do Sector Público (LRXSP) e normativa aplicable.

Terceiro. Conforme ao disposto no art. 64.2.d) da LPAC, o presunto responsable poderá recoñecer voluntariamente a súa responsabilidade, cos efectos previstos no art. 85 da dita lei.

Cuarto. Conforme ao disposto no art. 64.2.f) da LPAC, terá dereito a formular alegacións e á audiencia no procedemento.

Quinto. O presunto responsable poderá exercer o resto dos dereitos previstos no art. 53.2 da LPAC.

Sexto. Comunicarlle este acordo ao presidente da Xunta de Galicia, don Alfonso Rueda Valenzuela, para os efectos do seu coñecemento e, se é o caso, para que poida recusar ao instrutor e ao secretario sempre que se dean neles algún dos supostos previstos no artigo 24 da LRXSP. A recusación deberá facerse por escrito dirixido á Xunta Electoral de Galicia.



XUNTA ELECTORAL DE GALICIA

En execución do presente acordo, e para o cumprimento do disposto no art. 21.2 LOREX, desenvolvido pola Instrución da Xunta Electoral Central 11/2007, do 27 de setembro, comunícolle que contra el poderá interpoñer recurso de alzada ante a Xunta Electoral Central, que deberá presentarse ante esta Xunta Electoral de Galicia, para o seu informe, antes das 12:00 horas do próximo día 15 de febreiro de 2024.

O recurso poderá presentarse por correo electrónico no seguinte enderezo:
xunta.electoral.galicia@parlamentodegalicia.gal